




ԱՆՑՅԱԼԻ ԼՈՒՍԱՎՈՐ ԷԶԵՐԻՑ

ԱՆՁԵՎԱՅՅԱՑ ԽՈՍՐՈՎ ԵՊԻՍԿՈՊՈՍԻ,
ԸՍՏ ՅՈՒՐԱՔԱՆՉՅՈՒՐ ԺԱՄԵՐԻ ԵԿԵՂԵՑՈՒ ԿԱՐԳԻ
ՔԱՐՈԶՆԵՐԻ ԵՎ ԱՂՈԹՔՆԵՐԻ ԲԱՅՈՒՆԱՅՏՈՒԹՅՈՒՆԸ

ՔԱՐՈԶ ԳԻՇԵՐԱՀԱՍՏԱՆ

ՔՆԻ ՀԱՆԳՍՏԻՑ ԲՈԼՈՐ ԱՐԹՆԱՑԱԾՆԵՐՍ, ՈՐԸ ԸՆՈՐՀԵՑ ՄԵԶ
ՄԱՐԴԱՍԵՐՆ ԱՍՏՎԱԾ, Ի ՄԽԻԹԱՐՈՒԹՅՈՒՆ ԵՎ Ի ՍՓՈՓԱՆՔ
ՄԵՐ ՏԿԱՐՈՒԹՅԱՆ

Երանելի Խոսքովի մեկնությունը

Խոսքերի սկիզբը ցույց է տալիս Աստծու խնամքը, որ նախքան հանդերձյալ կյանքը այստեղ հանգիստ պարգևեց հոգևորություններից, հոգսերից, մեղքերից, և զանազան տրտմություններից՝ գիշերով և քնով: Քանզի, թեև սրանք պարտավորվեցինք կատարել հանցանքի պատճառով, սակայն մարդասեր Աստծու գութը չհանդուրժեց մեզ միշտ այսպիսի դժվարությունների մեջ թողնել, այլ մեր կյանքը բաժանեց և մի մասը տրամադրեց հանգստի համար՝ ոչ թե ըստ արժանիքների, այլ շնորհով՝ այսինքն հարկադրեց որպես անհատույց մարդասիրություն: Այդ պատճառով էլ ասում. ՈՐԸ ԸՆՈՐՀԵՑ ՄԵԶ ՄԱՐԴԱՍԵՐՆ ԱՍՏՎԱԾ, քանզի այս ոչ միայն [մարդու] կյանքին վերապահեց, այլև ոգու թմրությամբ ծանրություն դրեց աչքերի և մարմնի վրա: Եվ այդ պատճառով կոչ է անում արթնանալ քնի ծանրությունից, քանզի քնով մենք մխիթարվում, սփռվում և նորոգվում ենք հոգևորությունից: Ասում է. ԸՆՈՐՀԵՑ ՄԵԶ ՄԱՐԴԱՍԵՐՆ ԱՍՏՎԱԾ Ի ՄԽԻԹԱՐՈՒԹՅՈՒՆ ԵՎ Ի ՍՓՈՓԱՆՔ ՄԵՐ ՏԿԱՐՈՒԹՅԱՆ, ԵՎ ՄԻԱԲԱՆ ԵՎԱԾՆԵՐՍ:

Այստեղ ՄԻԱԲԱՆը կամ քարոզի¹ սկզբում ԲՈԼՈՐը ոչ թե անխորհրդարար է ավելացնում, այլ որպեսզի ցույց տա, թե Աստծու պաշտամունքի համար ամենքի միաբանվելը դյուրահաշտ է դարձնում Աստծուն և զորավոր է մեզ համար, իսկ դեռի մարտն՝ անգոր:

¹ Տեքստում կամ յառաջ ի Չարթուցեալսն թարգմանեցինք՝ քարոզի սկզբում:

ՀՈԳԵՎՈՐ ԵՐԳՈՎ ՄԵՐ ՏԵՐ ԵՎ ՓՐԿԻԶ ՀԻՍՈՒՍ ՔՐԻՍՏՈՍԻ ԱՄԵ-
ՆԱՍՈՒՐԲ ԱՆՎԱՆ ՓԱՌԱԲԱՆՈՒԹՅԱՆ ԵՎ ՊԱՏՎԻ ՀԱՄԱՐ.

ՀՈԳԵՎՈՐ ԵՐԳ ասելով բացատրում է, թե «Սուրբ Հոգին օգնության և գործակցության է գալիս մեր տկարության պատճառով» [ՀՌՈՄ. Ը 26] ըստ Պողոսի և երգակից է լինում մտքով սրբվածներին և Աստծու փառաբանությանը ջանացողներին: ՓԱՌԱԲԱՆՈՒԹՅՈՒՆ է կոչում, քանզի խոսքով ենք փառավորում Աստծու անկարող բնությունը: Իսկ ՏԵՐ ԵՎ ՓՐԿԻԶ ասելով ՏԵՐ՝ ստեղծելու պատճառով, մասնոր տիրում է մեզ, և Փրկիչ, ուղղվեալն անձը փրկանք տալով Իր արյամբ փրկեց մեզ մեղքից և մահից ու վերացրեց մեզ վրա եղած անեծքը: Այս պատճառով նրան հաճախ երկուսից էլ անվանում ենք, որպեսզի արարչությունից և խնամակալությունից, և ինչով, որ մեզ հետ մտերմություն ցույց տվեց՝ գոհանանք Նրանից:

ԱՀՈՎ ԵՎ ԴՈՂՈՎ ԱՂՈԹՔԻ ԿԱՆԳՆԵՆՔ ՆՐԱ ԱՌԱԶ.

Մեզ հրամայում է հրեշտակների ահն ու դողն ունենալ, այս պատճառով ավելացնում է, թե ՆՐԱ ԱՌԱԶ: Քանզի ինչպես հրեշտակները [Նրա] փառքի տեսիլքից միշտ ահով են, նույնպես և մենք դեպի Աստված մտքներս բարձրացնելով և կանգնելով ահագին փառքի առաջ, դողով պաշտենք Նրան:

ԵՎ ԳՈՀԱՆԱՆՔ ՆՐԱՆԻՑ ԱՅՍ ԳԻՇԵՐԱՅԻՆ ԺԱՄԻՆ, ՆՐԱ ԴԱՏԱՍՏԱՆԻ ԵՎ ԱՐԴԱՐՈՒԹՅԱՆ ՀԱՄԱՐ.

Քանզի Դավիթն ասում է. «Գիշերն արթնանում էի Քեզնից գոհանալու, Քո դատաստանի և արդարության պատճառով» [ՍՂՄ. ԾԺԸ 62]: Նույնը մեզ հրամայում է կատարել մասն [քարոզը] և ցույց է տալիս [Նրա] դատաստանն ու արդարությունը, որ կատարեց մեզ հետ՝ ոչ ըստ արժանիքի, այլ ողորմելով:

ՈՐ ԸՆՏՐԵՑ ՄԵԶ ԻՐ ՈՂՈՐՄՈՒԹՅԱՄԲ.

Ասում է, ՈՂՈՐՄԵՑ, այդ իսկ պատճառով ԸՆՏՐԵՑ, քանզի իբրև խոտան էինք և Աստծո դիմացից ընկածներ, [բայց] Նրա ողորմությունը մեզ ընտրյալներ դարձրեց ըստ առաքելական խոսքի «Ընտրեմ մեզ Նրա միջոցով, [այսինքն Քրիստոսով] մախքան աշխարհի արարումը, [որպեսզի] սուրբ և անարատ լինենք Նրա առաջ» [ԵՓԵՍ. Ա 4]:

ԵՎ ՇՆՈՐՀԵՑ ՄԵԶ ՈՒՆԵՆԱԼ ԵՐԿՆԱՅԻՆ ՀՐԵՇՏԱԿՆԵՐԻ ՆՄԱՆՈՒԹՅՈՒՆԸ,

որովհետև Նրանք փառաբանիչներ են երկնքում, ինչպես և ավելացնում է, թե ԵՐԿՆԱՅԻՆ ՀՐԵՇՏԱԿՆԵՐԻ, [քանզի] մեզ պարգևեց երկրում լինել հրեշտակներ և փառաբանողներ Աստուծո: Այս պատճառով նույնին կցում է.

[ՈՐՊԵՍՁԻ] ՄԵՆՔ ԵՎՍ ԼԻՆԵՆՔ ԲՈԼՈՐԻ ՏԵՐ ԱՍՏԾՈՒ ՓԱՌԱԲԱՆՈՂՆԵՐԸ.

ԵՎ ԱՍՏՎԱԾ, և՛ ՏԵՐ ԲՈԼՈՐԻ ասելով, մեր միտքը արթնացնում է նախաչել, թե կարգված ենք փառավորելու երկնքի և երկրի, և բոլոր արարածների Ստեղծողին: Ապա նույնի մոտ դնում է:

ԻՍԿ ՄԵՆՔ ԱՅՍՈՒՀԵՏԵՎ ՍՐԲԵԼՈՎ ՄԵՐ ԱՆՁԵՐԸ.

Այսինքն, որովհետև մեզ երկրում հրեշտակներ դարձրեց, [ուրեմն] մենք պետք է ունենանք հրեշտակների սրբությունը: Բայց, եթե ինչ-որ սխալված լինենք ըստ մարդկային բնության, խոստովանությամբ և ապաշխարությամբ այն սրբելով մաքուրներ դառնանք, քանզի ասում է սրբել

ՄԵՂՔԻՑ ԵՎ ՉԱՐ ԳՈՐԾԵՐԻՑ.

Եվ որովհետև մարգարեն հրամայում է. «Գիշերը բարձրացնել մեր ձեռքերը դեպի սրբություն» [հմմտ. ՍՂՄ. ԾԼԳ 2], ըստ այսմ էլ քարոզը հրահանգում է նախ սրբել մեղքը և չար գործերը, ապա ձեռքերը բարձրացնել դեպի սրբություն՝

ԱՌԱՆՅ ԲԱՐԿՈՒԹՅԱՆ ԵՎ ԵՐԿՄՏՈՒԹՅԱՆ ԲԱՐՁՐԱՑՆԵՆՔ ՄԵՐ ՉԵՌՔԵՐԸ ԴԵՊԻ ՍՐԲՈՒԹՅՈՒՆ,

ավելացնելով մարգարեականին նաև առաքելական խրատը, թե «Առանց բարկության և երկմտության» [Ա ՏԻՄ. Բ 8], քանզի աղոթականին անհրաժեշտ է աներկմիտ հավատով և անբարկանալի մտքով աղոթել Աստծուն, որի համար և Տերն ասում է. «Թող քո պատարագը՝ աղոթքները և գնա նախ հաշտվիր քո եղբոր հետ և ապա ինձ հետ» [հմմտ. ՄՏԹ. Ե 24]: Այս պատճառով քարոզը հրամայում է նախ բարկությունը թողնել, ապա Աստծուց քավություն հայցել, ասելով.

ՀԱՎԱՏՔՈՎ ԽՆԴՐԵՆՔ ՄԵՂՔԵՐԻ ԹՈՂՈՒԹՅՈՒՆԸ,

որպեսզի եղբայրների ներելով մեզ համար թողություն խնդրենք Աստծուց և հավատանք, որ կստանանք:

ԽՈՍՏՈՎԱՆԵԼՈՎ ԾԱԾԿԱԳԵՏ ԱՍՏԾՈՒՆ ՄԵՐ ՍՐՏԵՐԻ ԳԱՂՏՆԻՔՆԵՐԸ,

քանզի ասաց, նախ անձերը սրբել մեղքից: Այս օրինակը ցույց է տալիս, թե խոստովանելով և քավություն խնդրելով ենք սրբվում, որովհետև, եթե նույնիսկ չխոստովանենք, Ծածկագետից չենք կարող թաքցնել, այլ խոստովանելն ու հանցավորությունը հանձն առնելը մեզ մղում է խոնարհության ու ամոթի, զղջման ու պաղատանքի, որով Աստծուց ստանում ենք ողորմությունը, ներվելն ու արդարանալը: Քանզի մարգարեի միջոցով իսկ ասում է. «Նախ դու խոստովանիր քո անօրենությունները, որպեսզի խոստովանելով արդարանաս» [ԵՍ. ԽԳ 28]:

ՈՐՊԵՍՋԻ ԲՈԼՈՐ ՍՐԲԵՐԻ ԱՂՈԹՔՆԵՐՈՎ ԵՎ ԲԱՐԵԽՈՍՈՒԹՅԱՄԲ ԸՆԴՈՒՆԵԼՈՎ ՄԵՐ ՊԱՂԱՏԱՆՔՆԵՐԸ,

այսինքն, թե սրբերի բարեխոսությանը ապավինած, խոստովանությամբ խոնարհվելով և մեզ անարժան համարելով է պաղատանքն ընդունելի դառնում Աստծուն: Մանավանդ, եթե արթնանանք ոչ միայն քնից, այլև աշխարհի զբաղումներից և տեսակ-տեսակ ցնորքներից և արթուն հոգիներ ունենանք: Որը խնդրում ենք [սուրբերին] նախ մեզնից լսել և ապա ամենալուր Աստծուն լսելի դարձնել, որպեսզի փոխարենը

ՄԱՐԴԱՍԵՐՆ ԱՍՏՎԱԾ ԸՆՈՐՀԻ ՄԵՋ ԱՅՍ ԱՇԽԱՐՀՈՒՄ ԱՊՐԵԼ ԸՍՏ ԻՐ ԿԱՄՔԻ ԱՌԱՔԻՆՈՒԹՅԱՄԲ ԵՎ ԱՆԱՐԱՏ ՎԱՐՔՈՎ:

ԸՆՈՐՀԵԼԸ բացատրում է, որ Նրա պարգևները ձրի են, թեպետև շատերս ենք առաքինանում: Բայց, քանզի սիրում է մարդկանց, նաև առաքինությամբ ապրելն է շնորհ (առանց ոչ մի բիծ ունենալու և անարատ վարքով ապրելը), որ շնորհում է մարդասերն Աստված: Եվ առավել պատիվ է, քան արքայությունը, որին՝ [առաքինությանը] ընտրյալները ձգտում էին հույժ ցանկությամբ, քան երկնքի բարիքներից, որովհետև ոչ թե ցանկանում էին վարձ ստանալ Քրիստոսից, այլ ճգնել Քրիստոսի համար: Քանզի առ Քրիստոս ունեցած ջերմ սիրո պատճառով, նրանց բազմապատիկ ախորժելի էր չարչարվել Քրիստոսի համար, քան Քրիստոսի հետ փառքում լինել: Ինչպես և երանելի Հովհանն* է ասում, թե «նախընտրում եմ Քրիստոսի հա-

* Խոսքը Հովհան Օձնեցի հայրապետի մասին է:

մար կապանքներում լինել, քան քերովքների հետ Աստծուն մերձ լինել»։ Իսկ երանելի Աստվածաբանը գրում է. «Որպեսզի չասեմ, թե նույնիսկ տառապանքը վարձատրություն է, որ ամենևին մտքով առք ու վաճառք չէ»։ Նաև այս պատճառով ընտրյալ Գրիգոր Նյուսացին Սողոմոնի «Երգ երգոց» եղող օրհնություններում ասում է. «Հարսին ունի ոչ որպես վարձատրություն, այլ առաքինանալը սիրելու պատճառով»։ Իսկ արդարությունը ըստ Աստվածաբանի և Նյուսացու սահմանված է երեք մասերից. երկյուղի պատճառով, վարձատրության պատճառով, սիրո պատճառով։ Նյուսացին սիրո գերակայությունը բացատրում է ամուսնական մերձավորության օրինակով, իսկ Աստվածաբանը՝ որդիության, ապրողների երեք կարգեր ընդունելով. ծառա է կոչում երկյուղով ուղղվածներին, վարձկան՝ ստանալու պատրաստակամներին, բայց առավել քան սրանք որդի է կոչում ոչ թե վարձկանին, այլ հոր կողմից հավանածին։

Արդ՝ առաջին մեծ պարգևն այս է. առաքինությունն ստանալ, իսկ երկրորդը հավիտենական ուրախությանց արժանանալ, որը Քրիստոսին սիրողները կստանան Նրանից ըստ Նրա անսուտ խոստման։ Այդ պատճառով, որպեսզի չերկբայանանք խոստումների [նկատմամբ], ճշմարտությունից է համարում այն՝ ՈՐԸ ԽՈՍՏԱՑԱՎ ասելով այսպես։

ՃԾՄԱՐԻՏՆ ԱՍՏՎԱԾ ՏԵՐ ՄԵՐ ՀԻՍՈՒՍ ՔՐԻՍՏՈՍ, ԱՊՐԵՅՐՈՒ ԵՎ ՈՂՈՐՄԻՐ ՄԵԶ

Խնդրվածքով ավարտում է խոսքը և հիշատակում Տնօրինական անունները, որ մեզ համար ծնվեց և «Կոչվեց Հիսուս, որ է Փրկիչ» [հմմտ. ՄՏԹ. Ա 21, ՂՈՒԿ. Ա 31], քանզի մեզ փրկեց մոլորությունից և սատանայական գործերից և՛ մեղքից, և՛ անեծքից, և մահից, և՛ ապականությունից, և՛ դժոխքից։ Իսկ Քրիստոս անվանվեց, քանզի օծվեց Հոգով. «Կոչվում է Քրիստոս, այսինքն Օծյալ» [հմմտ. ՂՈՒԿ. Բ 11], և նույն Հոգով «օծեց նաև մեզ» [հմմտ. Բ ԿՈՐՆԹ. Ա 21] ու օծյալներ դարձրեց և քրիստոնյաներ անվանեց։

ՏԵՐ ՄԵՐ ԵՎ ԱՍՏՎԱԾ՝ ընդհանուրի Տիրոջը պարգևում է մեր սեփականը լինել։ Այս պատճառով է այնտեղ ավելացնում ՄԵՐԸ, որովհետև այսպիսով Նրան առավել գթության ենք մղում՝ ողորմելու և ապրեցնելու, ասելով.

ՏԵՐ ՄԵՐ ՀԻՍՈՒՍ ՔՐԻՍՏՈՍ, ԱՊՐԵՅՐՈՒ ԵՎ ՈՂՈՐՄԻՐ։

Նույնը և ժողովուրդն է ասում. ԱՊՐԵՅՐՈՒ, ՏԵՐ, քանզի թաղված էինք մեր մեղքերում և Քրիստոս կամենալով ապրեցնել աշխարհ եկավ և ասաց. «Եկա փրկելու և ոչ կորստյան մատնելու» (հմմտ. ՂՈՒԿ. Թ 56)։ Եվ որովհետև կորստյան էինք արժանի և ոչ կյանքի, բայց Նա ողորմելով փրկեց, այդ պատճառով քարոզն ասում է. ԱՊՐԵՅՐՈՒ ԵՎ ՈՂՈՐՄԻՐ՝ այսինքն, թեև անարժան ենք կյանքի, [սակայն] ողորմությամբ ապրեցրու, քանզի ողորմելը չի թողնում արժանավորին խնդրել, այլ հարկադրում է անարժաններին ևս ապրեցնել։

ՀԱՎԱՏՔՈՎ ԽՆԴՐԵՆՔ ՏԻՐՈՋԻՑ ԱՅՍ ԳԻՇԵՐՎԱ ՄՆԱՅՈՐԴԸ ԽԱՂԱՂՈՒԹՅԱՄԲ ԱՆՑԿԱՅՆԵԼ.

Հանապազ պարտավորվում ենք աղոթել խաղաղության համար, ոչ միայն մարմնի, այլև հոգու և մտքի խաղաղություն հայցել, որից և մեծ օգտակարություն, լուսավորություն և հատակություն է լինում առ Աստված աղոթքներում։ Իսկ ժողովուրդը միաբան ասում է ոչ թե տո՛ւր, այլ ԾՆՈՐ-

ՀԻՐ, ՏԵՐ՝ ամենուր խնդրելով՝ ողորմելով շնորհել, և ոչ թե մաղթում՝ գթությամբ արժանին տալ:

ՏԻՐՈՋԻՑ ԽՆԴՐԵՆՔ ՄԵՐ ԱՆՁԵՐԻ ՊԱՀԱՊԱՆ ԽԱՂԱՂՈՒԹՅԱՆ ՀՐԵՇՏԱԿԻՆ,

քանզի, «հրեշտակներ կան, որոնք պատժելու համար են առաքվում,— ասում է երանելի Հովհաննը,— և [հրեշտակներ] կան, որ պարգևների և խաղաղության արբանյակներ են», որոնց հայցում ենք առաքել մեր պահպանության ու փրկության համար և զորհանապազ մեզ հետ լինել:

ՏԻՐՈՋԻՑ ԽՆԴՐԵՆՔ ՄԵՂՔԵՐԻ ՔԱՎՈՒԹՅՈՒՆԸ ԵՎ ԹՈՂՈՒԹՅՈՒՆԸ,

քանզի հույժ անհրաժեշտ է ամեն ժամ մտածել, որ մեղավոր ենք Արարչի հանդեպ և ապերախտներ եղանք երախտավորի մոտ: Բայց առավել կարևոր է այս միաբանված կատարել և միմյանցով միմյանց համար պաղատել և իրար վրայից թեթևացնել մեղքերի բեռը: Քանզի մեր միաբանությամբ և՛ հրեշտակները, և՛ սրբերը կցորդակից են լինում մեր աղերսներին, իսկ Աստված առավել է խոնարհվում [դեպի] միաբանված խնդրանքները և հաշտվում, ինչպես և միմյանցիների միաբանվածներին քավություն տրվեց և հեռացրեց սպառնացած պատուհասը (տե՛ս ՀՈՎՆԱՆ Գ):

ՏԻՐՈՋԻՑ ԽՆԴՐԵՆՔ ՍՈՒՐԲ ԽԱՉԻ ԶՈՐՈՒԹՅՈՒՆԸ՝ Ի ՊԱՀՊԱՆՈՒԹՅՈՒՆ ՄԵՐ ԱՆՁԵՐԻ, որը Աստծու գթությունը մեծ պահապան պարգևեց մեզ, Իր անչափ արյամբ որպես սրված սուր, պատրաստ զենք տվեց մեր ձեռքը ընդդեմ մեզ հակառակ անմարմին թշնամիների, մահ անմատչելի պարիսպ և վահան մարմնավոր հակառակորդներից՝ միայն, եթե դրոշմենք մեզ աներկբա և անադատոր հոգով և բոլոր երևելի ու աներևույթ պատերազմները կհեռանան մեզանից: Միայն, եթե մեզ կնքելիս հիշենք մեր Տիրոջ մարդասիրությունը, որ Աստծո Որդի լինելով, սուրբ, անմեղ, անարատ, զատված մեղավորներից, մեզ՝ մեղավորներին համար, Իր մարմնով խաչի չարչարանքը կրեց: Նրան երկաթներով ամրացնելով և ցավերի սաստիկ կսկիծով մեր հանցանքների հատուցումը Նրանից պահանջվեց: Եվ խաչով քանդելով անեծքի և մեղքի դատակնիքը մեզ ազատներ, անսպիներ, անմահներ և անապականներ դարձրեց՝ Ինքը նրա վրա և՛ Քահանայապետ, և՛ զոհ լինելով: Եվ Իր արյամբ անմատույց երկինքների երկնքում մտնելով սրբությունների մեջ, հաշտեցնելով Հորը մեզ հետ, Իր մարմնով մեզ դեմհանդիման կանգնեցրեց: Աստծո դիմացից դատապարտությամբ ընկածներին, Աստծո որդիների մեջ կարգեց՝ Ինքը մարմնով խաչի վրա հաղթական բարձրանալով Հորից անբաժանելի մնալով Աստվածությամբ: Այդ պատճառով մեզ վրա խաչի նշանը դնելով հավատանք նույնինքն Աստծո Որդուն աստվածային արյամբ մեզ վրա կրելուն [մեր] դեմքին դրոշմելուն, գլուխները պսակելուն, անձերը պարսպելուն և հոգիների գրկում մեր հոգիների փրկությունը ընդխառնելուն: Եվ ապավինելով սուրբ Նշանին աներկյուղ լինել չարից՝ ըստ մարգարեի. «Չեմ երկնչի չարից, քանզի, Տե՛ր, Դու ինձ հետ ես, Քո ցույցն ու գավազանը նրանք պիտի մխիթարեն ինձ» [ՍՂՄ. ԻԲ 4, 5]: Արդ՝ այն հանապազ խնդրենք մեզ ի պահպանություն և նույնով միշտ պարծենանք և քարոզից այս լսելով, [խաչը] հավատքով պատկերենք մեր սրտերում և դեմքերին, իսկ Աստծուն սրտմտանքով ասենք. ՇՆՈՐՀԻՐ, ՏԵՐ, որը և քարոզի յուրաքանչյուր տներին սովոր ենք ասել և սրանով ավարտել: Ապա քարոզում է.

ԵՎ ԴԱՐՁՅԱԼ ՏԻՐՈՋԸ ԱՂԱԶԵՆՔ ՄԵՐ ՄԻԱԲԱՆՈՒԹՅԱՆ ԾՇՄԱՐԻՏ ՈՒ ՍՈՒՐԲ ՀԱՎԱՏՔԻ ՀԱՄԱՐ, որը մեծ խնդրանք է և կարևոր բոլորի համար՝ ճշմարիտ հավատքից հեռացածների և հերձվածներում մոլորվածների [համար] դարձ խնդրել և միաբանություն՝ ճշմարիտ հավատքում և «միաբանված ճշմարտության մեջ հաստատվել» (Բ ՀՈՎՀ. Ա 2), որի համար և Տերը ողորմեց բոլոր օրհնողներին, որովհետև պիտի ողորմի և գթության դառնալով խնամարկի Իր արարածներին, ինչպես նաև Իր արյան գնով գթալով չի թողնելու իսպառ կորչել:

ՄԵՐ ԵՎ ՄԻՄՅԱՆՑ ԱՆՁԵՐԸ ՀԱՆՁՆԵՆՔ ԱՄԵՆԱԿԱԼ ՏԵՐ ԱՍՏԾՈՒՆ.

Մեր և բոլոր հավատացյալների հոգիները, մանավանդ նրանցը, որոնք մեզանից աղոթք հայցեցին, պարտավոր ենք հանձնել Աստծուն, քանզի և այս իսկ սովոր ենք պատասխանել նրանց, թե Աստծուն հանձնեք: Այդ պատճառով և նախկինում այլ քարոզ չէին խոսում նրանց համար, որովհետև բավարարվում էին սրանով: Իսկ ԱՄԵՆԱԿԱԼը այստեղ ոչ թե անխորհրդաբար է ավելացնում, այլ որպեսզի մտածենք, թե բոլորի Տերը նույնն է և հասու բոլորին, նաև ամենքին Իր իշխանության տակ ունի, քանզի այս է Ամենակալը: Ապա նույն ինքը ժողովուրդը, դեպի Աստված խոսքըն ուղղելով միաբան ասում է.

ՔԵԶ՝ ՏԻՐՈՋԴ ԹՈՂ ՀԱՆՁՆՎԵՆՔ:

Նույն [մտքին] է հանգեցնում նաև քարոզն ավարտին.

ՈՂՈՐՄԻՐ ՄԵԶ, ՏԵՐ ԱՍՏՎԱԾ ՄԵՐ, ԸՍՏ ՔՈ ՄԵԾ ՈՂՈՐՄՈՒԹՅԱՆ, բայց ոչ որքան մենք ենք խնդրում և ճանաչում, այլ որքան մեծ է Քո բնության ողորմությունը, քանզի ինչպես Աստված՝ Ինքն է անսահման, այդպես և [Իր] ողորմությունը: Ողորմություն ըստ մեզ ասվում է սրտում նեղությունների, վշտերի և վարանումների մեջ որևէ մեկին ցավակցելը և ըստ կարողության վտանգվածին թեթևացնելը: Թեպետև պարտավոր չենք, բայց սրտի ճմլումը որպես պարտավորվածի մեզ մղում է կարեկցության: Այս նաև մենք ենք Աստծուց աղաչում, թեև այլ դեմքով ասում ենք արժանի չենք Քո պարգևներին, քանզի ընկանք փառքից, որ տրվեց Քեզանից, և վտարվեցինք դրախտից, նաև մահվամբ ու ապականությամբ դատապարտվեցինք ու խորովվում ենք և՛ հոգսերի, և՛ տրտմությունների, և՛ հոգնությունների, և՛ տեսակ-տեսակ ցավերի, և՛ տառապանքների, և՛ տարակուսանքների մեջ՝ զրկված Քո սուրբ տեսությունից: Իսկ բանասերկուին անհաշտ պատերազմող ունենք, նաև որոգայթադիր ու մեղսածու զանազան ախտերով, և եղկելիներ ենք ըստ հոգու, ըստ մարմնի և ըստ մտքի, քանզի նույնիսկ [մեր] բնությունը մեզ հակառակ կարգվեց: Այսպիսի աղետներին նայելով Դո՛ւ, Ամենողորմ Տեր, և Քո մեծ ողորմությամբ, մեզ ամենքից ողորմելի Դո՛ւ, համարելով, ողորմես մեզ Քո անչափ ողորմությամբ: Այս ողորմագին պաղատանքի ձայնին ժողովուրդը ևս միաձայնում է հայցվածներին առհասարակ ասելով. ՈՂՈՐՄԻՐ, ՏԵՐ:

(շարունակելի)

Պատրաստեց՝ ՎԱԶԳԵՆ ՍՐԿ. ԳԱԼՍՏՅԱՆ